

Den cuadro di nan 60 aniversario

Biblioteca Nacional Aruba cu exposicion di Gustave Nouel



ORANJESTAD - Pa celebra e a aniversario 60 di Biblioteca Nacional Aruba (BNA) e pintor Gustave Nouel (www.nouel.net) a ser invita pa un exposicion individual di 60 dia na BNA. Apertura di e exposicion retrospectivo di Gustave Nouel lo ta dia 20 di augustus y esaki lo dura te 20 di october 2009, como parti di un proyecto junto cu Multi Media International, Toyota Art Gallery y posiblemente

MusaArtHouse. Coördinacion di e proyectonan di Nouel apoya pa BNA lo ta den man di Drs. Mirto Laclé (IPA).

Na Universidad di Aruba Sra. Ana Fingal tambe ta mirando e posibilidadnan, pa ofrece un workshop di sketch modelo femenino y masculino, riba nivel di Masterclass di Gustave Nouel. Participacion lo ta limita y lo mester reserva y inscribi na tempo pa ta sigur di

por participa na Universidad di Aruba, riba nivel maximo (post-academico). Hende cu no por participa na e Masterclass na Universidad di Aruba lo por inscribi pa un workshop riba nivel normal na Toyota Art Gallery.

Pa un lectura na Universidad di Aruba, relaciona cu intercambio di arte visual den nos Reino Hulandes, lo purba di trece Dr. Ing. J.



Huisman, prome siman di september 2009. Asina tur hende na Aruba lo tin oportunidad pa hasi tur pregunta directamente na Dr. Huisman, voorzitter di Art Promotion Internacional. Tambe un lectura di Dr. Huisman na Universidad di Aruba riba un intercambio cultural entre China, Hulanda y Aruba, cu API ta preparando, lo ta posibel.

E proyectonan menciona di API, tambe ta conosi na Ministerio di Cultura y tin apoyo di Angelo Tromp na Instituto di Cultura y di Comision Nos Cultura 2025.

Probando cu Dr. Huisman lo ta na Aruba, Sra. Anna Marie Proveyer-Groot di Directie Onderwijs ta buscando formanan pa incorpora den enseñansa un proyecto di Dr. Huisman, asisti pa Gustave Nouel y Stan Kuiperi, pa duna un workshop pionero riba Picasso na mucha

di 10 pa 12 aña.

Un lectura di Dr. Huisman pa docentenan y hende interesa na Aruba, tocante e frutonan di e proyecto di Picasso na Hulanda, tambe ta ser considera.

Biblioteca Nacional Aruba, durante su celebracion 60 lo apoya presentacion di Art Promotion International, cooperando cu Universidad di Aruba y Directie Onderwijs. Apoyando e proyectonan aki como parti di celebracion 60, directora di Biblioteca Nacional Aruba, Astrid Britten y Roque Dirksz junto cu Directie Onderwijs y Universidad di Aruba ta ofrece publico y juventud di Aruba e oportunidad pa disfruta di arte visual riba nivel internacional y ta habri porta pa proyecto nobo y crecimiento artistico na Aruba junto cu Art Promotion International.